

La'ó Hamutuk

Institutu Timor-Leste ba Monitor no Analiza Dezenvolvimentu

Rua D. Alberto Ricardo da Silva, Bebora, Dili
Tel: +670 332 1040 Mobile: +670 7723 4330

Email: laohamutuk@gmail.com Website: www.laohamutuk.org



Komunikadu Imprensa

9 Marsu 2022

Hapara Funu Kontra Ukránia Viziñu sira bele Simu Refujiadu husi Ukránia

Funu entre Rúsia no Ukránia tama ona iha faze konkretu, ema barak hanoin, konfliktu ida ne'e iha de'it tensaun abstratu, infelizmente semana hirak liu ba Rúsia halo invazaun kontra Ukránia. Husi atake ida ne'e, rezulta ona ema barak mate, estraga infrastrutura barak iha territóriu Ukránia nian no ema liu tokon rua (2.000.000) mak hasai sai ona husi Ukránia.

Ami preokupa tebes funu iha Ukránia, ema sivíl no inosente sira mak sei sofre konsekuénsia todan husi aktu ilegál no violente ida ne'e, ema barak sei lakon moris, lakon riku soin no diretu ba liberdade hotu. Dalan di'ak liu mak konfliktu sira bele hetan rezolusaun husi komunikasaun pasífiku, respeita soberania kada territóriu nasaun ida nian.

Besik tinan 50 liu ba, Povu Timor-Leste hetan invazaun husi Indonézia no okupa territóriu ida ne'e ba tinan 24. Kauza husi invazaun no okupasaun ilegál, hamate Timor oan besik 200.000, destroi riku soin barak populasaun sira nian, ema sivíl sira barak sofre tratamentu desumanu oin-oin. Ikus liu, povu Timor-Leste manán independénsia no duni sai invazór husi nasaun ida ne'e.

Too agora, Indonézia, nasaun seluk no kompañia sira ne'ebé simu benefísiu husi invazaun no okupasaun ida ne'e, seidak simu julgamentu iha nivel akontabilidade ida ne'ebé kredível, sira mós seidak ejerse obrigasaun reparasional atu hadi'ak fali estragu hotu ne'ebé sira halo durante periodu funu.

La'ó Hamutuk apresia deklarasaun husi Misaun Permanente Timor-Leste nian iha Nasoins Unidas durante sesaun estraordináriu Assembleia Jerál Nasoins Unidas ba dala 11. Deklarasaun ida ne'ebé apela ba Nasaun hotu atu respeita lei internasionál, Deklarasaun Universal Direitus Umanus no respeita ba integridade soberania kada Nasaun nian.

Iha mundu rai klaran, ema barak halo esforsu maka'as atu atinje dame, Nasoins Unidus investe rekursu oin-oin hodi esforsu atu atinje pás no seguransa iha Rai klaran, maibé iha fatin barak kontinua iha okupasaun no funu, militarizmu no ditadura hodi nega diretu no liberdade umanidade nian. Iha Yemen, Sahara Osidentál, Palestina, Mianmar, Papua Osidentál no sira seluk, ema mate rihun ba rihun, diretu umanu barak ba hetan violasaun.

Timor-Leste nudár nasaun ne'ebé hetan invazaun husi viziñu boot ida, ami nian kanek sira seidak fitar, violasaun kontra ami nian diretu fundamental sira seidak lakon husi ami nian memória. Nune'e ami sujere atu Nasoins Unidas no Nasaun boot sira atu ajuda povu iha Ukránia, no la aumenta intensidade funu ne'e nian.

Ami ezije atu Rúsia tenke sai imediatamente husi Territóriu Ukránia atu hapara sofrimentu grave ba Populasaun sivíl sala laek sira.

Ami ezije ba NATO la ho podér osidental hodi fó presaun ba Rúsia atu prevene funu ne'ebé sai boot liu tan no hamosu konsekuénsia sai boot liu tan kontra Umanidade no seguransa mundiál.

Ami mós husu atu Nasaun viziñu sira atu simu refujiadu husi Ukránia, nune'e bele hamenus sira nian sofrimentu todan ne'ebé hetan husi violénsia armada ida ne'e.

Mak ne'e de'it obrigadu barak!